

Piginneqatigiilluni inissiat pillugit Inatsisartut inatsisaata allanngortinnissaa pillugu Inatsisartut inatsisaat (Inissiat attartortittakkat allanngortinnerat, kaaviiaartitsinissamut inerteqqut il.il.)

§ 1

Piginneqatigiilluni inissiat pillugit Inatsisartut inatsisaanni nr. 33, 23. november 2017-imeersumi, Inatsisartut inatsisaatigut nr. 19, 27. november 2018-imeersutigut allanngortinneqartumi makku allanngortinneqassapput:

1. § 8, imm. 5 imatut oqaasertalerneqassaaq:

” Imm. 5. Imm. 2-4 malillugit inissiap annertussusaata naatsorsuiffiginerani inissiami majuartarfinnut ilanngaateqartitsisoqassanngilaq. Torsuusat, majuartarfiit majuartarfillu sangoriaat ataatsimoorussat, illup silammut iigaasa iluini inini kiassakkani inissisimasut angissusaannut naapertuuttumik uuttortaanermut ilanngunneqassapput, taamaattorli annerpaamik 11 kvadratmeterinik annertussusilerneqassallutik.”

2. § 8-mi imm. 6-tut ilanngunneqassaaq:

” Imm. 6. Naalakkersuisut inissiap annertussusaanut sanaartornermi iluserineqartut tulluarterippassuk imaluunniit pisariaqartippassuk imm. 2-5-imut saneqqutsisut naatsorsuiffiginissaannut akuersissuteqarsinnaapput.”

3. Immikkoortumut qulequtaq ”Taarsigassarsititsinissamik neriorsuuteqarneq” sioqqullugu 10-p kingorna ilanngunneqassaaq:

” **§ 10 a.** Namminersorlutik Oqartussanut nunatsinnilu kommuninut qularnaveeqqusiussaqluni taarsigassarsititsinnermut allagaq aamma akiitsunut uppersarsaat illuliortiterneq pillugu Inatsisartut inatsisaat manna imaluunniit siusinnerusukkat inatsisaasut naapertorlugit tunniunneqartut kaaviiaartitanut, qularnaveeqqusiisarnernut imaluunniit akiliisitsisussamit malersorneqarnissamut atorneqarsinnaanngillat. ”

4. § 13, imm. 2 imatut oqaasertalerneqassaaq:

” Imm. 2. Taarsigassarsiat annertussusissaat sanaartukkanut naatsorsuutit inaarutaasut tunngavigalugit

naatsorsorneqassapput. Sanaartornermut naatsorsuutini piginneqatigiilluni inissiat sanaartornerannut atsumik aningaasartuutinnagortut tamarmik ilanngunneqassapput. Sanaartukkanut naatsorsuutit kukkunersuiisartumit nalunaarsorneqartumit, kukkunersuiisumit naalagaaffimmit akuerisaasumit imaluunniit Kalaallit Nunaanni aningaaserivimmit uppersarsarneqarsimassapput.”

5. § 22, imm. 2 imatut oqaasertalerneqassaaq:

” Imm. 2. Neriorsuutitut allakkiap suliarineqarnerani ulluliunneqartumit ukiut marluk qaangiutsinnagit sanaartugassaq aallartinneqarsimanersoq, aallartinneqarsimannginnersorluunniit pillugu sanatitsisoq kommunalbestyrelsimut paasissutissanik nassitsissaaq. Sanaartugassaq aallartinneqarsimassappat, tamanna pillugu sanatitsisup uppersarsagaanik, sumiiffimmilu kommunimi teknikkimut ingerlatsiviup uppersarsagaanik uppersarsaat ilanngullugu nassiunneqassaaq.”

6. § 22, imm. 4, imatut oqaasertalerneqassaaq:

” Imm. 4. Neriorsuutitut allakkiap suliarineqarnerani ulluliunneqartumit ukiut pingasut qaangiutsinnagit kommunalbestyrelsimut atuilernissamut akuersissutip assilineri sanatitsisup nassiutissavaa.”

7. Kapitali 4-p kingorna ilanngunneqassaaq:

”Kapitali 4 a

Namminersorlutik Oqartussat kommunillu inissiaataat attartortittakkat piginneqatigiilluni inissiatut allanngortinneqassapput

§ 45 a. Naalakkersuisut imaluunniit kommunalbestyrelsip illuutip attartortittakkap pioreersup piginneqatigiilluni inissiatut najugassanngorlugu allanngortinnissaanut aalajangiinnaapput. Allanngortitsinissaq illuutit attartortittakkat pioreersut Naalakkersuisut imaluunniit kommunalbestyrelsip piginneqatigiilluni inissiaatillit peqatigiiffiannut pilersinneqartumut ataatsimut tunisinikkut pissaaq.

Imm. 2. Naalakkersuisut imaluunniit kommunalbestyrelse piginneqatigiilluni inissiaatillit peqatigiiffianni inissianut tamanut atuinissamut pisinnaatitaaffik atorlugit piginneqataasutut ilaalissapput.

§ 45 b. Naalakkersuisut imaluunniit kommunalbestyrelsi allanngortitsisoqarnissaanut aamma piginneqatigiilluni inissiaatillit peqatigiiffiata pilersinneranut atsumik pisortat innaallagissamik, imermik, kiassarnermik aqqusersuutinillu pilersuinerannut illuutini attartortitsisoq piginneqatigiillunilu inissiaatillit peqatigiiffiat aalajangiinissamut pisussaaffeqalernissaannik, tassungalu piumasaqaatinik aalajangersaasarnissamik, peqqusinnaavai.

§ 45 c. Naalakkersuisut imaluunniit kommunalbestyrelsi illuliortiternernut ilisimasalimmik atorfinitsitsissapput, taannalu illuutitut attartortittakkanut qanoq issusermut nalunaarusiamik suliaqassaaq. Naalakkersuisut imaluunniit kommunalbestyrelsi sulianut ilisimasalimmik kimulluunniit attuumassuteqanngitsumik atorfinitsitsissapput, taannalu illuutit attartortittakkap niuerfinni naleritinneqartumik naatsorsuissaaq.

Imm. 2. Qanoq issutsinut nalunaarusiat, niuerfinnilu naleritinneqartumik naatsorsuinissaq pillugit Naalakkersuisut malittarisassanik aalajangersaasinnaapput.

§ 45 d. Illuutit attartortittakkat pioreersut piginneqatigiilluni inissiaatillit peqatigiiffiannut tunineranni pisinermi akia tamarmi piumasaqaatillu allat Naalakkersuisunit imaluunniit kommunalbestyrelsimit aalajangersarneqassapput.

Imm. 2. Illuut attartortittagaq niuerfinni akigitinneqartoq atorlugu tunineqassaaq, taamaattoq inissiaq tamakkerlugu minnerpaamik 7.000 kr./m²-imut akeqassaaq. Naalakkersuisut Inatsisartut Aningaasaqarnermut Akileraartarnermullu Ataatsimiititaliaata akuersissuteqarneratigut illuut attartortittagaq akigitinneqartumit minnerpaaffusumit akikinnerutillugu tunisinnaavaat. Kommunalbestyrelsi Naalakkersuisut akuersissuteqarnerisigut illuut attartortittagaq akigitinneqartumit minnerpaaffusumit akikinnerutillugu tunisaqarsinnaavoq.

§ 45 e. Naalakkersuisut kommunalbestyrellu piginneqatigiilluni inissiaatillit peqatigiiffiata illuummik attartortittakkanik inissartaqartumik tigusineranut atatillugu, atugassarititaasut sukumiinerusumik isumaqatigiissutaareersut tunngavigalugit piginneqatigiilluni inissiaatillit peqatigiiffiannit ininik attartornissamut pisinnaatitaaffeqarnissani piumasarisinnaavaat. Taamatuttaaq tigusinermi attartortut allalluunniit illuummut tunngatillugu atuisinnaatitaasut, tassunga ilaallutik inuussutissarsiutinik ingerlatsinissamik pisinnaatitaaffeqartut, tigusinermi pisinnaatitaaffeqarnerisa atuutiinnarnissaat piumasarineqarsinnaavoq.

§ 45 f. Naalakkersuisut imaluunniit kommunalbestyrelsi illuummik attartortittakkamik Naalakkersuisunit imaluunniit kommunalbestyrelsimit piginneqatigiilluni inissiaatillit peqatigiiffiata pisineranut taarsigassarsititsissapput. §§ 3-10 assinganik atorneqarput, taamaattoq takuuk imm. 2.

Imm. 2. Pisortat taarsigassarsiarititaanni imm. 1 naapertorlugu taarsigassarsiaritinneqartuni, taarsigassarsianut tigusinerup nalaani aserfallatsaaliuisoqarsimannginnerata uppersarneqartup iluarseqqinnissaanut aningaasalersornissaanullu piginneqatigiilluni inissiaatillit peqatigiiffiannit taarsigassarsiarineqartunut tunngatillugu, akilersorneqartussat tulleriinnilersorneranni nikisitsinissaq uppersaaserneqassasoq, Naalakkersuisut imaluunniit kommunalbestyrelsip akuerisinnaavaat, takuuk § 45c.

Imm. 3. Naalakkersuisut imaluunniit kommunalbestyrelsi piginneqatigiilluni inissiaatillit peqatigiiffiani inissianut piginneqataaffusunut immikkut nammineerluni aningaasaliissutissanik akiliuteqassapput.

§ 45 g. Piginneqatigiilluni inissiaatillit peqatigiiffiannut inissiamut akitsuummut inissianut piginneqatigiiffimmut atuinnissamut pisinnaatitaaffimmut ilaasumut aalajangersaaffigineqartumut piginneqatigiilluni inissiaatillit peqatigiiffiat Naalakkersuisunut imaluunniit kommunalbestyrelsimit akiliitsiniassapput.

§ 45 h. Piginneqatigiilluni inissiat kapitalimut uunga ilaasut allanngortitsisoqareernerata kingorna piginneqatigiilluni inissiaatillit attartortuinut pioreersunut tuniniarnissaat neqeroorutigineqassaaq. Piginneqatigiilluni inissiat inoqanngitsut imaluunniit inoqarunnaartut tuniniarnissaat neqeroorutigineqassaaq.

Imm. 2. Naalakkersuisut imaluunniit kommunalbestyrelsip piginneqatigiilluni inissiamik tunisinerini akeq anguneqarsinnaasoq pitsaanerpaaq atorlugu, taamaattoq tak. imm. 3, aammalu massakkut inatsisartut

inatsisaat atuuttoq peqatigiiffullu ileqqoreqqusai naapertorlugit piginneqatigiilluni inissiaatillit peqatigiiffiat aqqutigalugu pissaaq. Taamaattoq piginneqatigiilluni inissiaatillit peqatigiiffiat piginneqatigiilluni inissiap attartortumut pioreersumut tunineqarnissaanut akerliusinnaangilaq.

Imm. 3. Piginneqatigiillernermi pisinermi akia tamarmiusoq minnerpaamik Naalakkersuisut imaluunniit kommunalbestyrelsip nammineerluni akiliutigisimasaasa naleqqatigissavaa. Inissiaatillit peqatigiiffiata piginneqatigiilluni inissianik tigusineranit qaammatinit aqqaneq-marlunnit kingusinnerusumit piginneqataassutimik tunisinermi Naalakkersuisut imaluunniit kommunalbestyrelsip nammineerluni akiliutimi 20%-ia tikillugu akikilliliissuteqarluni piginneqataassutisik tunisisinnaavoq.

Imm. 4. Piginneqatigiilluni inissiaatillit peqatigiiffiat pissutissaqarnani uninngaqaarnani piginneqataassutisik tuniniaasinnaavoq. Piginneqatigiilluni inissiaatillit peqatigiiffiat piginneqataassutitut inummik pisisussamik takutitsisinnaangippat, piginneqatigiilluni inissiaatillit peqatigiiffiata piginneqataassut tamanut tunisassanngorlugu pilerisaarutigissavaa.

§ 45 i. Naalakkersuisut imaluunniitkommunalbestyrelsi piginneqatigiilluni inissiap inoqanngitsup tuniniarnissaanik pinngitsoortitsisinnaapput inissiarlu piginneqataaffigineqartoq allamut attartortilerlugu. Attartortitseqqinneq piginneqatigiilluni inissiap tuninissaa piginneqatigiilluni inissianut, inissianut pigisanut aamma inissianut nammineq pigisanut sumiiffimmi pineqartumi niuerfinni akigitinneqartunut malunnaatilimmik ajortumik sunniuteqarsinnaanera ilimanarsimappat pisinnaavoq.

Imm. 2. Allamut attartortitsineq taamaallaat atugassarititaasut piffissamut killiligaasut tunngavigalugit aammalu qaammatit 12-ikkaarlugit pissaaq, qaammatit 6-ikkaarlugit sivitsuisarnissaq periarfissaqarluni. §§ 63-65 taamaaqataanik atuutissapput.

Imm. 3. Attartortitseqqinnermik isumaqatigiisummik sivitsuisoqartinnagu piginneqataassutisip tunineqarnissaanut periarfissat Naalakkersuisut imaluunniit kommunalbestyrelsip nutaamik naliliiffigissavaat.

§ 45 j. Attartortoq, inigisaminik attartortittakkamik piginneqatigiilluni inissiatut tigusinissamik kissaateqanngitsaq, inissiamini attartortittakkami najugaqaannarsinnaavoq.

Imm. 2. Naalakkersuisut imaluunniit kommunalbestyrelsi piginneqataasutut, attartortup piffissami attartorfiusumi iliuuseqarnerinut, iliuuseqannginnerinut aamma aalajangiinerinut allanut, piginneqatigiilluni inissiaatillit peqatigiiffiannut tunngatillugu, akisussaasuvoq. Attartortoq § 65 malillugu nammineerluni pisinnaatitaaffimminik killilersuiffigineqarnissaa pillugu allakkatigut ilisimatinneqassaaq.

Imm. 3. Attartortumut inissiami najugaqaannartumut ineqarnermut akiliut Namminersorlutik Oqartussat kommunillu inissiaataannut attartortikkanut ineqarnermut akiliutit naatsorsortarnissaanut malittarisassat nalinginnaasut qaqugumulluunniit atuuttut malillugit aammalu inissiat attartortittakkat pillugit inatsisit qaqugumulluunniit atuuttut malillugit aalajangersarneqassapput.

Imm. 4. Piginneqatigiilluni inissiaatillit peqatigiiffiata ileqqoreqqusaani aalajangersakkat attartortumut illuummi najugaqaannartumut atuutiinnassapput.”

8. § 49, imm. 4 ima oqaasertalerneqassaaq:

” *Imm. 4.* Imm. 1 aamma 3 atuutissanngillat Naalakkersuisut, kommuni imaluunniit sanatitsisoq namminersortoq piginneqatigiilluni inissiaatillit peqatigiiffianni piginneqataasutut inississimappata. ”

9. § 55 imatut oqaasertalerneqassaaq:

” § 55. Piginneqatigiilluni inissiaq najugaqarfissatut najornerata saniatigut siunertanut allanut atorneqaqqusaanngilaq, taamaattoq takuuk imm. 2, § 45 aamma § 45e.

Imm. 2. Piginneqatigiilluni inissiap inuussutissarsiortunut namminersortunut mikinerusunut atorneqarsinnaanera ataatsimeersuartut akuersissutigisinnaavaat, inuussutissarsiullu piginneqatigiilluni inissiap piginnittuanit taassumalu inoqutigiivinit ingerlanneqarsinnaavoq. Inuussutissarsiortut namminersortut mikinerusut pisisartut pulaartarnerannik kinguneqartitsissanngillat.”

10. § 61-imi imm. 2-tut ilanngunneqassaaq:

” *Imm. 2.* Najugaqartussaataitanermi Naalakkersuisut, kommuni imaluunniit sanatitsisoq namminersortoq piginneqatigiilluni inissiaatillit peqatigiiffiannut piginneqataasutut ilaalersoq ilaatinneqanngillat. ”

§ 2

Inatsisartut Inatsisaat ulloq 1. januar 2025 atuutilissaaq.

Imm. 2. § 1, nr. 6, Namminersorlutik Oqartussat kommunillu illuutaanni attartortittakkani kingusinnerpaamik ullormi 31. december 2024 atuilernissamut akuersissut tunniunneqartoq atorlugu atorneqartassapput.

Namminersorlutik Oqartussat, ulloq 6. decembari 2024

Múte Bourup Egede (atsior.)

Naalakkersuisut Siulittaasuut

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

